



Das Gott Bergwerke im Anfange geschaf-
fen/ Vnd noch erhelt/ segnet/ vnd in vielen Orten
gedeyen lesset.

Est ohne allen Zweifel gewiß/
daß/ wie Gott im Anfang/ durch sein wort
Himmel vnd Erden/ Berg vnd Thal ge-
schaffen/ vnd die Erde mit allerley lustigen
Bäumen vnd Kräutern gezieret/ daß er
auch inwendig die Berge gleichfalls/ durch sein Spre-
chen/ Klüffte/ Flöz vnd Gänge/ sampt der samhaftten
Krafft/ Saft vnd Dünste/ darauß Schwefel vñ Queck-
silber/ vnd allerley Metall wachsen/ geschaffen habe/ vnd
also die wüsten Berge geschmücket/ vnd mit edlen Adern
vnd findigen Gängen/ die Silber vnd Gold/ vnd andere
Metall führen/ umbgürtet.

So dann Gott der Schöpffer der Metallen:

Warumb gedencet Moses in der Beschreibung der
Schöpfung aller Dinge/ der Bergwerke vnd
Metallen nicht.

Der liebe Moses hat allein vor sich genommen/ zu be-
schreiben die Creaturen/ die vor Augen seyn/ vnd allezeit
jederman offenbar/ Derwegen aller deren Dingen/ so
Gott in der tieffen Erden verborgen/ als edle vnd dienst-
liche Steine/ allerley Metall/ Erzt/ Bergarten/ auch
Erd vnd Bergsafften/ Als Bornstein/ Kampffer/ Petro-
lium, Erdwachse/ Erdflachs/ Saltz/ Alaun/ Kupfferwas-
ser/ vnd dergleichen nicht gedencet/ deren doch hernach
in der Schrift gar oft/ als Gottes Geschöpfe vnd Ga-
ben/ gedacht werden.

Wo gedencet die H. Schrift Erstlich
der Metallen.

Als bald im Anfang wird gedacht/ der reichen Gold-
Seiffe/ im Fluß Pison/ welcher ist der Fluß Ganges, der
durch das Goldland India, Goldsande vnd Körner füh-
ret/ wie Moses saget/ Gen: 2. Da findet man Goldt/ vnd
das Goldt des Landes ist köstlich/ wie Plinius auch rüh-
met. Wie nun das Goldt/ als das köstlichste Metall/ im
Anfang geschaffen/ also auch die andern Metall so ge-
ringer seyn.

Dann da Gott im Anfang die Erden ansprache/ vnd
ihr Befehl gab/ Sie solte auffgehen lassen/ Grass vnd
Kraut/